

八虜州志卷三十三

名宦二

周

類孫吾知盈孫魏獻子以爲涂水大夫

涂水卽謂徐吾餘今榆次

子之不失職能守業者也

賈辛晉人敬王初從籍談荀躒定王子朝之亂魏獻子以爲祁大夫

魏戊獻子庶子獻子爲政謂戊不失職能守業以爲梗陽

大夫

梗陽卽今徐溝

謂成鱣吾與戊也縣人其以我爲黨乎對

曰戊之爲人也遠不忘君近不偪同見利思義在約思純有守心而無淫心雖與之縣不亦宜乎

司馬贊寧爲王子朝亂督從籍談荀躒帥師定之魏獻子

以爲平陸大夫

平陸卽今文水

董安于趙氏臣治晉陽公宮之垣皆以荻蒿苫楚廬之高至丈餘室皆鍊銅爲柱質後智伯率韓魏伐趙襄子適晉陽發而用之三國之兵乘城而戰三月不能拔卒敗智伯軍

鐸趙氏臣簡子使爲晉陽請曰以爲繭絲乎抑爲保障乎簡子曰保障哉鐸損其戶數簡子誠襄子曰晉國有難而無以尹鐸爲少無以晉陽爲遠必以爲歸及智伯伐趙襄子乃走晉陽智伯圍而灌之沈竈產鼃民無畔意

大戊午趙成侯三年爲相伐魏取鄉邑七十三及肅侯十

六年游大陵

大陵卽晉平陵邑今文水也

出於鹿門大戊午扣馬曰

耕事方急一日不作百日不食肅侯下車謝

邳辛魏大夫治晉陽道不拾遺

漢

蕭山字子驕東海蘭陵人望之子舉賢良遷太原都尉治有聲多稱薦者元始中爲中散大夫

郭伋字細侯扶風茂陵人高祖父解伋少有志行王莽時爲并州牧更始徵拜左馮翊建武十一年省朔方刺史屬并州帝以盧芳據北土乃調伋爲并州牧伋前在并州素結恩德及入界縣邑老幼相迎所過問民疾苦聘求耆德設几杖之禮與參政事行部到西河美稷有童兒數百各騎竹馬迎拜事訖諸兒復送至郭外問使君何日當還伋謂別駕從事計日當告之行部旣還先期

大原府志卷三十三
一日伋爲違信於諸兒遂止於野亭須期乃入伋知盧
芳夙賊難卒以力制常嚴烽堠明購賞以結寇心芳將
隨昱遂謀脅芳降伋乃亡入塞北伋以老病上書乞
骸骨二十二年徵爲大中大夫

郭丹字少卿南陽穰人更始時舉賢能建武十三年大司
馬吳漢辟舉高第再遷并州牧有清平稱永平三年爲
司徒

馮衍字敬通野王之孫幼有奇才王莽時諸公多薦舉之
衍辭不仕著顯志賦以自勵後仕爲陽曲令建武六年
日食衍上書陳八事帝將召見衆共排之遂得罪西歸
故郡

劉瓚字文理平原人遷太原太守郡有豪強中官親戚爲

百姓所患瓚深疾之到官收其魁帥殺之所藏匿主人
悉坐伏誅桓帝徵詣廷尉以瓚宗室不忍致之于刑使
自殺

鄧訓字平叔新野人禹少子也少有大志樂施下士永平
中理滹沱石臼河從都廳至羊腸倉欲令通漕太原吏
人苦役連年無成前後沒溺死者不可勝筭建初三年
拜訓謁者使監領其事訓知大功難立具以上言肅宗
從之遂罷其役全活徒士數千人屢有邊功卒於張掖
太守元興元年以后父賜策追封謚曰平壽敬侯
蘇章字孺文扶風平陵人少博學能屬文安帝時舉賢良
方正對策高第爲議郎順帝時遷并州刺史以摧折權
豪忤旨坐免隱身鄉里不交當世卒于家

大凡尺一
卷三十三
三

胡芳爲并州刺史度遼將軍皇甫規欲退身避第數上病
不見聽會上郡太守王晏喪還規縞素越界到下亭迎
之因令客密告芳言規擅違軍營公遠禁憲當急舉奏
芳曰威明欲避第仕途故激發我耳吾當爲朝廷愛才
何能中此子計耶遂無所問

宋果字仲乙扶風人性輕悍喜與人報仇爲郡縣所疾郭
林宗乃訓之義方舉以禍敗果感悔遂改節自飭後以
烈氣聞辟公府侍御史并州刺史所在能化

鄧盛爲并州刺史郡人賂佛少無名行而太原太守王球
名以補吏郡吏王允固爭球欲殺允盛聞之馳傳辟允
爲別駕從事允由是知名而賂佛以之廢棄

趙岐字邠卿京兆長陵人少明經有才藝仕州郡以廉直

疾惡見憚後南部烏桓鮮卑畔公卿舉岐擢拜并州刺史岐欲奏守邊之策未及上會坐黨事因揆次以爲禦寇論又是時綱維不攝閹豎專權嘗擬前代連珠之書四十章上之留中不發而岐遂遭黨錮去建安六年卒著孟子章句三輔決錄傳於時

鄭昌字次卿泰山剛人弟宏字穉卿亦好學皆明經通法律政事次卿爲太原太守宏爲南陽太守皆著治蹟條教法度爲後所述

臧旻臧洪父也有幹才達於政爲漢良吏初爲徐州從事辟司徒府爲盧奴令冀州牧遷揚州刺史終太原太守所在有名

晉

荀藐或云浪武帝時爲榆次令爲政以德懷民時鳳集其境武帝下詔褒美云就之如日月敬之如神明愛之如父母樂之如時雨今縣南有荀政鄉藐去民思之故云劉暉字長升東萊掖人毅子正直有父風爲侍御史劾司徒王渾郭彰嘗曰我能截君角暉勃然曰天子法官而欲截角乎求紙筆奏之彰不敢言遷太原內史趙王倫之亂假征虜將軍不受與三王共舉義倫誅入爲左丞終右光祿大夫太子少傅散騎常侍後勸王彌曹嶷歸

正遇害

王陟永興二年任嵐州牧時劉淵稱帝將攻嵐石等州劉琨與陟約拒寇陟曰公不負朝廷陟敢負公哉協力守禦卒賴保全後陟旣還其地乃陷

北魏

元延爲并州刺史道武皇始二年并州守將封直率其種族與徒河爲逆將攻延延討平之

樓伏連代人忠厚有器量從征姚平於柴壁以功賜爵安邑侯爲晉兵將軍并州刺史招誘西河曹成等七十餘人襲殺吐京護軍及其守士三百餘人并擒叛逆阿度支等二百餘家太宗嘉之後晉爵廣陵王薨諡恭

辛祥字萬福隴西狄道人紹光之孫也舉司州秀才太傅元丕爲并州刺史祥爲府屬敕行建興郡轉并州平北府司馬會刺史喪朝廷以其公清遂越長史敕行州事祥初在司馬有白壁還兵藥道顯被誣爲賊官屬推處咸以爲然祥曰道顯面有悲色察獄以色其此之謂乎

苦執中之月餘別獲真賊後除郢華二州長史卒
荀狐爲并州刺史不治產死之日家無餘財百姓追思之
孫小字茂翹咸陽石安人夏時没入官刑魏平統萬徙平
城以聰識有智畧稱屢著戰功賜爵泥陽子出爲冠軍
將軍并州刺史晉爵中都侯州內四郡百餘人詣闕頌
其政化小嘗重郭祚門才以祚爲主簿兼任之以書記
時人多之

韋孝寬字叔裕杜陵人以薦爲并州刺史鎮玉壁高歡以
大衆來攻連營數十里盡攻擊之術孝寬拒破之歡智
力俱困因發疾夜遁去西魏帝嘉其功授驃騎大將軍
進爵建忠郡公

北齊

李稚廉趙郡高邑人少而寡欲初不從家人有所求請嘗故以金寶授之終不取強付輒擲之于地州牧以其蒙稚而廉故名曰稚廉天平中高祖擢爲秦州開府長史平北將軍稚廉輯諸將士軍民樂悅世宗嗣立除霸府掾謂杜弼曰并州王者之基須好長史各舉所知時雅有所稱皆不允衆人未答世宗乃謂陳元康曰我教君好長史處李稚廉卽其人也遂命爲并州長史天保初除安南將軍太原郡守天統中爲并省都官尚書武平五年三月卒於晉陽贈吏部尚書

王晞字叔朗北海劇人猛六世孫也淹雅有器度好學不倦隨神武到晉陽補中外府功曹參軍帶常山王演友齊天保初行太原郡事濟南立常山王從駕除晞并州

長史王還并除丞相府司馬晞性閒淡寡欲雖王事執
掌每遇良辰美景嘯咏遨遊人謂之物外司馬嘗詣晉
祠賦詩忽有相王使召晞不時至後仕至儀同三司隋
初卒於洛陽

蘇瓊字珍之武強人文襄以儀同開府引爲刑獄參軍每
加勉勞并州嘗有強盜長流參軍推其事所疑賊並已
拷伏失物家並識認唯不獲盜賊文襄付瓊更令窮審
乃別推得元景融等十餘人並獲賊驗文襄大笑語前
妄引賊者曰爾輩若不遇我好參軍幾致枉死累遷南
清河太守循聲尤著仕至大理卿卒於周

隋

辛公義狄道人開皇中爲并州刺史下車先至獄中露坐

驗問獄囚十餘日斷決殆盡方還受訟皆不立文案訊問不盡應須禁者公義卽宿廳事或諫曰君何自苦也答曰刺史無德令百姓繫于囹圄豈有禁人在獄而心自安乎罪人聞之咸白嘆服後訟者多兩讓而止

長孫行布河南洛陽人右驍衛將軍晟子仁壽中爲漢王諒庫直甚見親狎於并州起兵南拒官軍留行布城守遂與豆盧毓等閉門拒諒城陷遇害

張祥京兆人并州司馬時漢王諒反遣將劉建功縱火燒其郭祥於城西王母廟再拜泣禱曰百姓何罪致此焚燒神其有靈可降雨相救言訖雨降火遂滅士卒感其至誠莫不用命賊退以功授開府

陶模京兆人性明敏有器幹仁壽初爲嵐州司馬漢王諒

舉兵刺史喬鍾葵發兵將赴諒模拒之曰漢王所圖不軌公荷國厚恩致位方伯當竭誠效命以答慈造豈有寢園未淹翻爲厲階鍾葵臨之以兵模辭氣不撓鍾葵義而釋之軍吏請斬模以壓衆心遂囚于獄諒平拜開府後從平楊元感以功進位銀青光祿大夫

王威太原郡丞大業十三年義兵將起威與武牙郎將高君雅相與疑懼請高祖禱雨晉祠將爲不利晉陽鄉長劉世龍知之以告高祖高祖執威君雅殺之

郭湛大業末爲祁縣令縣人張道源有孝行湛署其所居爲復禮鄉至孝里

唐

劉文靜字肇仁京兆武功人大業末爲晉陽令與晉陽宮

監裴寂善唐公鎮太原深自結託後坐李密姻屬繫獄秦王入禁所視之文靜曰太原百姓避盜者皆入此城文靜爲令數年知其豪傑可得十萬人尊公所領兵復且數萬君言出口誰敢不從秦王笑曰君言正合吾意文靜遂介寂以交唐公義兵起奉命使突厥突厥卽遣二千騎隨文靜至又獻馬千匹唐公喜曰非君何以致之以功封魯國公後拜民部尚書爲寂構害

殷嶠字開山雍州郿縣人仕隋太谷長有治名義兵起召補大將軍府掾叅預謀畧後封鄭國公卒謚節

孫湛貞觀中爲榆次令引洞澗水西流溉田民利之政以嚴稱吏不敢犯

鄧義高宗時爲祁縣令有異政邑人刻石頌之

張柬之字孟將襄陽人登進士第調清源丞永昌元年以
賢良名時年七十餘對策第一狄仁傑姚崇薦之累拜
鳳閣侍郎同平章事以誅張易之昌宗功擢天官尚書
同三品封漢陽郡王加特進爲武三思所誣貶瀧州卒
景雲中贈中書令諡文貞

韋安石京兆萬年人孝寬曾孫舉明經永昌元年爲并州
司馬有善政則天手勞之曰閭卿在彼庶事從心善政
表於能官仁明彰于鎮撫如此稱職深慰朕懷俄拜并
州刺史仕至中書令封郇國公天寶初諡文貞

富嘉謨雍州武功人舉進士長安中爲晉陽尉與同官吳
少微友善先是換碑頌皆以徐庾爲宗嘉謨與少微屬
詞皆以經典爲本時人欽慕文體一變稱富吳體長史

張仁重之待以殊禮中興初歷左臺監察御史卒

吳少微新安人舉進士長安中官晉陽尉長史張仁重重之嘗爲撰進九鼎銘表神龍初以薦拜右臺監察御史富嘉謨卒少微賦詩哭之尋病卒

谷倚魏郡人長安中官太原主簿以文詞著名與富嘉謨吳少微稱北京三傑

張知泰蒲州河東人舉明經神龍中累拜御史封漁陽郡公以忤武三思出爲并州刺史天兵軍使仍帶本官尋徙魏州卒諡定

呂元泰爲清源尉神龍元年大水求言元泰上書言時政曰國家者至公之神器一正則難傾一傾則難正今中興政化之始幾微之際可不慎哉方今帑藏虛竭戶口

亡散兼之水旱爲災年穀不登乃驅役饑凍雕鐫木石
營構不急勞費日深恐非陛下中興之要也書聞不報
嚴挺之華州華陰人景雲中舉進士開元二年爲太原少
尹殿中監王毛仲嘗使太原朔方幽州計會兵馬後累
年仍牒太原索器仗挺之以不挾勅且毛仲寵幸久恐
有變故密奏之及毛仲得罪上以挺之言忠擢爲刑部
侍郎

戴謙爲文水縣令開元二年於縣東北五十里鑿甘泉渠
二十五里鑿蕩沙渠二十五里鑿靈長渠千畝渠俱引
文谷水傳溉田數十頃

杜暹濮州濮陽人舉明經開元十四年同平章事未幾罷
累轉太原尹卒贈尚書右丞相諡貞孝暹公清勤約不

通獻遺所至以廉幹聞

韋濟鄭州武陽人隴右河西黜陟使恒子也開元中爲太原尹製先德詩四章述祖父之行辭致高雅濟從容雅度所蒞人推善政終馮翊太守

李銳宗室子明皇時爲太原少尹遷汾州刺史善于其職復爲太原少尹築天城軍完葺邊備卒贈尚書右僕射苗蕃字陳師壺關人進士第佐江西使有勞三年使卒後辟不肯留獨護其喪葬河南選補太原參軍假使職獄平貨滋息吏斂手不敢爲非元和二年卒

李尚一趙州房子人父之兄爲清源尉兄弟皆以文章名裴寬開元時爲太原尹明皇帝餞寬詩云德比代雲布心如晉水清

嚴武挺之子也嘗爲太原府叅軍以材能著與杜甫交善
鎮蜀時甫嘗依之

安庭堅開元中爲太谷令有德政邑人立碑有紀焉

李殷爲太谷令北京尹上言殷釐務公廉以德化下獄無
囚繫刑無鞭朴薪水之事不擾于民力賦興之數不失
于公程三時勸農躬行田井乾糞曝鐵裹行而食一邑
熙熙長幼有序流者歸復如戀父母今考秩垂滿衆情
願留敢希明恩重令治任詔下褒美量留一年

楊仲續爲祁令甚有德惠人爲立祠

崔衍安平人太子賓客倫子天寶末擢明經爲清源令勸
民力田懷附流亡觀察使馬燧表其能徙美原果遷宣
歙池觀察使

辛旻從李光弼定恒趙後署太原三城使史思明屯相州及滏陽旻逆擊走之後守河陽卒

烏承玘字德潤張掖人累立戰功李光弼表爲冠軍將軍封昌化郡王爲石嶺軍使王思禮爲節度使軍政倚辦焉

路審中徐州吏隴賊之亂能著奇節累擢嵐州刺史遷右羽林將軍

後唐

何瓚閩人唐末舉進士及第莊宗爲太原節度使辟爲判官張承業卒代知留守事爲人明敏通於吏事外若疎簡而內頗周密明宗時拜西川節度副使卒

李承勳爲太原少尹晉王遣使燕賀冊尚父至燕而劉守

太原府志 卷三十三
光已僭號有司迫承勲稱臣承勲不屈以列國交聘禮
入見守光怒殺之

張承業字繼元唐僖宗時宦者本姓康幼爲內常侍張泰
養子昭宗爲李茂貞所迫奔太原先遣承業使晉以道
意因以爲河東監軍晉王病且革以莊宗屬承業曰以
亞子累公等莊宗在魏與梁戰河上十餘年軍國之事
皆委承業凡所以畜積金帛收市兵馬勸課農桑而成
莊宗之業者承業之功爲多自貞簡太后韓德妃伊淑
妃及諸公子在晉陽者一切以法繩之權貴皆斂手畏
承業天祐十八年莊宗已諾諸將卽位承業方卧病聞
之自太原肩輿至魏諫曰大王父子與梁血戰三十年
本欲雪國家之讐而復唐之社稷今元兇未滅遽以尊

名自居非王父子之初心且失天下望不可莊宗謝曰此諸將之所欲也承業曰不然梁唐晉之仇賊而天下所共惡也今王誠能爲天下去大惡復列聖之深讐然後求唐後而立之使唐之子孫在誰敢當之使唐無子孫天下之士誰可與王爭者臣唐家一老奴耳誠願見大王之成功然後退身田里使百官送出洛東門而令路人指而嘆曰此本朝敕使先王時監軍也豈不臣主俱榮哉莊宗不聽承業知不可諫乃仰天大哭曰吾王自取之悞老奴矣肩輿歸太原不食而卒年七十七贈左武衛上將軍謚正憲

宋

田仁朗大名元城人太平興國四年太原平留仁朗爲兵

馬鈴轄閑廡使俄命同武再興役民築榆次新城端拱
中卒仁朗沉厚有謀畧所至著善政

高斷勳字紹先瓊子咸平中遷洛苑使并代州鈴轄徙屯
尙嵐軍遼兵五萬屯草城川誘令南伏兵寒光嶺大敗
之以功授建雄軍節度使卒贈太尉後追封康王諡穆
武

龔父咸平二年任榆次令營建廟學雅重士流

張伯玉仁宗時爲太谷令愛民勤政廣興水利邑民賴之
滕甫字元發以字行知太原府河東兵勞民貧而上豪將
吏皆利于有警故喜作邊事民不堪命甫始至蕃族來
賀令曰謹斥候無開邊隙有寇而失備與無寇而生事
者皆斬自軍司馬沿邊安撫以下皆勸以軍法西人獵

境上河外諸將請益兵甫曰寇來則死之吾不出一兵也陽曲縣舊治城西汾決徙城中縣廢爲荒田甫奏還之使縣堤防如黃河民復成市諸將駐列城者長吏或不悅摺誣以事有至死者甫奏立法將有罪徙他郡訊驗諸將聞之喜曰公保吾生當報以死議者謂近世名將無及甫云甫爲文與詩英發妙麗每出一篇學者爭誦之篤于行義事父母撫諸弟以孝友聞臨大事決大議毅然不計死生其事上及與人交馭將吏待妻子奴婢一以至誠仕至龍圖閣學士上柱國南陽郡開國侯有文集二十卷

劉渙字仲章保塞人文質子以父任監并州倉天聖中上書請章獻后還政將黜隸呂夷簡薛奎力救得免熙寧

中以工部尚書致仕卒

張岳字子雲府谷人明鎬在河東以岢嵐軍當雲朔路奏
岳爲麟府路駐泊都監兼沿邊都巡檢使駐岢嵐張亢
修瀕河堡障初議置安豐砦于石臺神岳以爲非要害
地遂徙砦于生地骨堆以扼賊左右親信曰擅易砦地
可乎岳曰苟利國家得罪無憾也卒易之後中流矢創
發卒

馮京字當世鄂州江夏人舉進士自鄉舉禮部至廷試皆
第一英宗時以端明殿學士知太原府神宗立召爲翰
林學士擢樞密副使時河東麟府豐三州城壘兵械不
治官吏皆受譴京以先帥本道上章自劾曰使諸路帥
臣知其雖一時脫去後能倖竊名位者猶必行法將不

敢復偷惰曠職優詔不聽召知樞密院事致仕卒諡文簡京爲郡守諸縣公事報下捷疾一無壅滯人服其敏云

王素字仲儀莘人太尉旦季子舉進士熙寧初以端明殿學士知太原府汾河大溢素曰若壞平晉遂灌州城矣亟命具舟楫築堤以壅之一夕水驟至人賴以安入知通政銀臺司致仕卒諡懿敏

司馬旦解州夏縣人池子以父任歷知祁縣天大旱人乏食羣盜剽劫富家巨室至以兵自衛且召富者開以禍福於是爭出粟減直以糶饑者獲濟盜患亦弭舉監在京百萬倉時祁隸太原以太原留不召仕至大中大夫范純仁吳縣人仲淹子哲宗時判太原遣屬收葬無主燼

骨復檄一路倣此時葬者以萬計後判國子監以劾王
安石左遷河中府累官至尚書右僕射諡忠宣

范純禮純仁弟知太原初禁宰牛未得令會有牛死者純
禮以數百錢買葬之宰牛者愧而止每給糧官吏及軍
士皆出一廩雖有濕惡衆無怨言

郭永大名府元城人少剛明勇決身長七尺鬚髯若神以
祖任入官知太谷縣太原帥率用重臣每宴饗費千金
取隸縣以給歛諸太谷者尤亟永以書抵幕府曰非十
一而取皆民膏血也以資觴豆之費可乎脫不獲命令
有投劾而歸耳府不敢迫縣有潭出雲歲旱巫乘此譁
民永杖巫暴日中雨立至縣人刻石紀其異府遣卒數
輩號警盜刺諸縣短長遊蠹不歸莫敢迕永械致之府

府爲并他縣追還部使者及郡文移有不便于民必條
利病反復或遂寢而不行人謂永毋賈禍永曰知行吾
志而已遑恤其他太谷人安其政以爲自有令無永比
者旣去數年復過之則老稚遮留如永始去靖康未提
點河東刑獄建炎初宗澤檄犄角大名遂殉城謚勇節
桑安世紹聖初知榆次縣事勸課農桑教名務本嘗引澗
河水曲折數十里溉田惠利不竭

陳知白爲太原縣尉分引晉水溉田民用大饒

王舜臣元符二年任岢嵐牧時兵破夏寇擒其僞將嵬阿
里遼人代爲請和舜臣上言爭之章惇納賂寢其議

鄭驥字潛翁信州玉山人元符進士通判岢嵐軍高宗初
以直秘閣知同州兼沿河安撫使殉城謚威愍

范純粹字德孺仲淹子用蔭入官徽宗初復寶文閣待制
知太原府後入黨禁復徽猷閣待制卒純粹沉毅有幹
畧才應時須歷任胥以治辦聞

曾肇字子開建昌南豐人鞏弟第進士建中靖國中以龍
圖閣學士知太原府崇寧中蔡京得政落職卒肇更十
一州類多善政云

師範丹徒人崇寧初督岢嵐軍政守嵐時太原等十一郡
地震彌旬晝夜不止壞城壁屋宇人畜死者甚衆範上
言請復正臣豐稷去蔡卞等以回天變蔡卞覩其奏大
怒裂牘不使上進矯旨配嶺南去之日嵐人遮突於道
車馬不得行

劉适武經郎政和三年任岢嵐牧政尚簡樸廳舍生連理

杏十餘株時以爲德政所感

錢卽字中道吳越王諸孫第進士徽宗時爲徽猷閣待制知太原府以童貫宣撫本道辭不許居二年以疾提舉洞霄宮後童貫引爲河北河東參謀以老固辭致仕卒諡忠定

蘇過字叔黨眉州人軾子以詩賦解兩浙路禮部試下任右承務郎徽宗時監太原府稅亟游晉溪終通判中山府過圃名小斜川自號斜川居士時稱小坡蓋以軾爲大坡也

唐恪字欽叟杭州錢塘人以蔭登第知榆次縣豪子雄於鄉萃逋庇姦不輸公賦前後莫敢詰恪以理善曉之悟而自改折節爲長者恪仕至少宰後以議張邦昌仰藥

卒

陳從易字簡夫泉州晉江人第進士爲嵐州團練推官仕至龍圖閣直學士卒從易好古爲行歷官以清德聞盛子思崇寧間知榆次兼兵馬監押教閱保甲持身廉慎支行政事皆可師法

李諒宣和初知榆次兼管兵馬司公事性平恕富經術政尚寬簡人以良牧稱之

黃友字龍友温州平陽人七歲能詩長入太學每謂同舍曰大丈夫不能爲國立功是亦造化中贅物耳登崇寧五年進士第累立戰功官直徽猷閣制置司叅謀隨種師中解太原圍引兵奪榆次縣明日進十里而止友白師中以非地不聽嘆曰事去矣黎明士卒奔潰友被執

寇曰降即赦汝友厲聲曰男兒死耳罵不絕口寇怒以
脂蠟塗其身倒豎焚之朝廷贈官至中大夫御書忠節
傳家字旌其門閭官其後八人

金

盧孝儉宣德州人登天眷二年第累官太原少尹大定二
年陝西用兵尚書省發本路稅粟赴平涼充軍實期甚
嚴迫孝儉輒易以金帛馳至平涼用省而不失期并人
稱之用廉晉官二階後以子用官帑及禍

蒲機知文水縣常稔渠存碑記

烏古論德升益都路猛安人明昌二年進士知太原府事
權元帥左監軍興定元年元兵急攻太原糧道絕德升
屢出兵戰道復通二年元兵復圍太原已破壕垣德升

植柵爲拒出其家銀幣及馬賞戰士元軍壞城西北隅以入德升聯車塞之三却三登矢石如雨守陴者不能立城破德升至府署謂其姑及妻曰吾守此數年不幸力窮乃自經死姑及妻皆自殺贈翰林學士承旨子兀里偉幼詔以奉御俸養之

楊伯元字長卿開封尉氏人大定二年進士以榆次令召爲大理評事官至工部侍郎累遷安武軍節度使以才幹多被委任爲推排定課使及審錄官人稱其平卒諡達

史純大定間以忠顯校尉爲陽曲令撫馴其民嘗禱雨烈石祠有應卽作記

楊邦基字德懋華陰人好學天眷二年登進士第爲太原

交城令太原尹徒單恭貪汙不法託名鑄金佛命屬縣
輸金邦基獨不與恭怒召至府將以手持鐵拄杖撞邦
基面邦基不動承德廉察官吏尹與九縣令皆免去邦
基以廉爲河東第一名爲禮部主事大定中同知西京
留守事致仕卒

烏林答吾干女泰和三年爲榆次令有識幹訟者立辯曲
直無不允服

喬天翼爲合河令

合河卽今興縣

元兵陷城不屈死嘉靖三十二

年提學閔註以蒞政有功臨難守節請登正祀

李好復中山安喜人爲榆次令安集流逋撲滅奸盜後入
爲巡警使嘗縛一犯禁護衛寘于法人憚其嚴

元

馬英初遁跡石州金末避兵合河元署興州觀察使判官
政成訟息惠愛及民嘉靖三十二年崇祀

攸哈刺拔都渤海人善射戊寅授金虎符河東北路兵馬
都元帥鎮太原修城池繕兵甲招降屬邑市肆不改遠
近聞之皆相率來歸嘗微服夜出聞民間語曰吾屬父
母子女相失矣下令軍中凡俘獲有親者聽贖無質者
官爲贖之民得完聚者衆在鎮數載屢敗金兵丁亥五
月奸人夜獻太原東門於武仙仙引兵入哈刺拔都塵
戰仙兵大至諸將自城門外呼曰當速出哈刺拔都曰
真定平陽隰州皆失守矣我又棄太原將何面目見主
上乎家屬任公等所俘吾誓與城存亡遂歿于陣太祖
以其子幼命其表弟王七十復守太原後又命哈刺拔

都長子忙兀臺嗣守太原

澄字彥清懷來人父資榮金末爲交城令以縣來附賜

金符爲元帥左都監仍兼交城令年四十移病舉弟資

用自代資用卒澄襲職澄幼穎敏爲交城令時年十九

汾陽郭帥堰文谷水折以理令均其利於民豪民持吏

短長察得主名皆以法治之乙未籍民戶有司多以浮

客占籍及征賦逃竄殆盡官爲稱貸民無以償澄入覲

因中書耶律楚材面陳其害太宗惻然免之壬子復大

籍民澄盡削交城之土著者賦以時集甲寅留世祖

藩府而以其弟山代爲交城令

胡祗適字紹開磁州武安人至元元年忤阿合馬出爲太

原路治中兼提舉本路鐵冶將以歲賦不辦責之及蒞

職乃以最聞改河東山西道提刑按察副使

程元直亳州人至元間爲交城令勸農興學政平訟簡陞絳州守

李德輝字仲實通州潞縣人年六十監酒豐州市筆札錄書夜誦不休中統中爲山西宣慰使權勢之家籍民爲奴者咸授而免之復業近千人至元元年授太原路總管時潛藩故傳相無有出爲二千石者上以太原難治故以德輝爲守至郡崇學校表節孝勸耕桑立社倉一權度凡可以阜民者無不爲之嘉禾瑞麥六出其境五年徵入七年命錄囚山西河東行至懷仁民有魏氏發得木偶持告其妻爲厭勝移數獄詞皆具德輝察其寃知魏氏有愛妾疑妾將構陷其妻召妾鞠之不移時而

服遂杖其夫而論妾以死時稱神明

楊致道清苑人天歷二年由西河主簿陞文水縣令蒞任
五載清潔善撫字爲諸縣最

程克明禹城人榆次尹下車首詢民瘼修舉惠政會歲饑
勸富室出粟賑之全活甚衆

張儉大同人延祐間自秀容主簿遷榆次尹爲政公平斷
獄明允旁邑訟有不直者咸來質成尤能以善迺人而
喻以愛親敬長之道百姓愛之立德政碑

月輪失帖木兒延祐間治太谷公廉有爲嘗請免太谷協
濟庶民爲立碑頌德

齊思恭大名路人先爲國子助教元統間尹榆次蒞政嚴
明豪猾斂迹邑人愛慕久而不衰

齊元夔樂城人至正間知興縣撫字有方流移復業

劉鏞忻州人至正間令榆次以儒飾吏筆翰如流時巨寇

劉入忽等自陝至潛出邑境鏞察其有異收之果服人

以爲神

李繼本東安人至正間以翰林檢討出爲山西省理問尋

授太原府同知以文學政事著聲

楊克公河間景州人至正四年任興州知州革弊平訟吏

民思之

侯洪字有容太原人舉進士初爲離石判官進尹榆次廉

直無私遇事立決雖簿書纖悉不遺

顏瑜曲阜人復聖五十七代孫以行誼舉任陽曲教諭訓

迪士子殷殷不倦被賊執罵不絕口死

明

謝忠上虞人洪武初任太谷縣主簿以文學政事著稱承谷容武進人洪武初任交城縣丞勸課農桑平徭薄賦陞宛州府同知

杜斌洪武初任嵐縣以廉能著績民傳頌之

楊榮祖寶應人洪武初任交城課農桑均徭役後以憂去民思慕之

潘原英山東歷城人洪武初任太谷令改築城池重葺廟學雅善課士當兵戈凋殘之際興賢育才絃誦不輟尹暹安豐人洪武初任興縣政平訟簡賦役均平陞知遼州民思其惠後遷平陽同知

韓文寶洪武二年仕徐溝令措置有方公廨學校壇墼驛

傳以次修舉

胡維賢直隸定遠人洪武初以平陽府同知陞太原知府
清謹端正剔蠹蒐弊解紛決壅談笑處之創修太原府
治見葉砥碑記

姚翥直隸永平人洪武間任榆次令公廉謹恪蒞政有爲
民懷其惠擢知府

王天爵南部人洪武間以賢良舉知太原府直諒不欺當
初赴名時太祖問所讀經以書對因試欽若昊天文稱
旨問治州縣如何對曰首在得民心民心旣得則州縣
事治矣又問以知府對曰當戒左右無爲州縣擾則府
事治矣旣又問以布政使對曰是則臣見所未及也太
祖歎息稱善遂以太原命之居官有治績

劉觀直隸保定人洪武間以進士任太谷令善催科不事
敲扑而輸將競勸聽訟能得情政事之暇督諸生讀書
親爲講授以考績去行李蕭然擢監察御史累官布政
司叅政

施文學洪武間任奇嵐知州時奇嵐遺黎僅存文學撫綏
有法民獲復蘇乃按古酌今於有關治化者悉力修舉
黃福字如錫山東昌邑人洪武間由鄉貢授項城縣簿改
清源清廉仁愛民無不懷以憂去終南京吏部尚書進
少保贈太保諡忠宣

宋烜唐縣人洪武中以人材任祁令廉慎有爲以才行超
卓遷御史終知府

陳章應晉江人洪武中進士榆次縣丞調安邱藩憲考其

學優廉幹以狀聞特降旌榜嘉之終禮部主事

馬謙順德人洪武間交城縣丞興學勸農政績甚著陞戶

部主事

陳棟儀封人洪武間任文水崇尚文學以禮導民

張羽陝西武功人舉人洪武間任文水令建治廨學邑有

稱十虎三彪一太歲者悉按法徒之時以爲能

郝瑾邯鄲人永樂中任太原縣有惠政滿去人多思慕之

汪添昂麻城人永樂間任祁縣以循良著績

崔忠唐縣人永樂間嵐縣典史在任九載廉聲大播

蘭從善河南磁州人永樂間任太原縣教諭博學工文造

士寬嚴有方退閒手一卷諷詠後累官翰林學士

劉俊直隸淮安人永樂間任榆次令器宇軒豁遇事周詳

慎重措置得宜未浹期頌聲丕作

范宣河南歸德人永樂間任榆次訓導邃於問學章采蔚然言動有則諸生奉爲模楷

楊春汶上人宣德間任文水政尚簡易時稱爲良牧

孫慶安定州人宣德間任興縣多所營繕不取於民後陞監察御史

周禮任邱人正統間祁縣丞學問該博造士綏民

郝鳳直隸人正統間任嵐縣令修城捍民設阱禦敵

劉純山東歷城人正統間任嵐縣令剛直不阿人皆稱頌
王璉咸陽人正統間任嵐縣以廉能稱

張瓚字宗器孝感人正統間進士知太原府有善政後巡撫四川移總督漕運卒

劉文莊直隸正定人正統間任太原府知府習吏事知民
隱興舉悉當聽訟明敏

劉因鹽城人正統初以布政司檢校擢陽曲令能以廉自
守涖政明敏無留牘累官應天府治中

劉敏直隸大興人正統間以舉人任太原令修葺城垣濬
鑿濠塹練習吏事行寬於嚴擢太原府同知

滕淵祥符人正統間任嵐縣典史有廉能聲當道皆重其
材嘗承檄率民兵戍偏頭關秩滿去行李蕭然

王恭直隸晉州人景泰三年以舉人任榆次訓導性恭謹
與諸生講解日夕不倦聞者豁然

劉震字伯威河南洛陽人景泰七年任榆次令撫民以恩
尤慎於刑獄而豪強讐服盜賊自化

党忠字行恕陝西富平人景泰間以舉人任榆次教諭嚴
重有師範勤於作人所列科條詳明簡要在白鹿鷺湖
之間

李維新陝西狄道人景泰七年以監生任徐溝令政以振
飭爲先涖任九年擢中城指揮

張玘直隸霸州人景泰間以監生知清源縣重學惠民後
陞霍州知州

高安河南睢州人景泰間以進士任文水令揮霍有長材
處煩劇裁決裕如施爲有次第嘗修縣解開渠水迄成
功不用民間一錢擢監察御史

成憲字伯度山東新泰人天順元年以舉人任榆次訓導
博極羣書於易尤邃善化導經指授者悉有成就

大原府志 卷三十三
宋賓中部舉人天順間任陽曲簿詢民隱抑制豪強陞陝

州知州

王孕延津人天順間任祁縣牧民有方既去人思之

孫緝豐城進士天順間任嵐縣剛毅不苟決斷如流吏畏其明訟願其愬重修文廟陞監察御史

王準陝西神木人天順間任嵐縣知縣清廉勤慎嘗修學宮翊文教士風丕變

陳鑑臨清人舉人成化初知岢嵐州蒞政三載教化大行歲旱省刑撤從禱城隍曰吾與公幽明雖殊同主一方忍眎斯民坐斃邪乃以鐵索各繫其頸同暴烈日中頃之大雨

張紀成化間任岢嵐警敏有才智舉不失當尤長於救荒

貧窶廢業者施給牛種流民皆歸

張鼎字大器陝西咸寧人成化間以進士知太原府鼎受業薛文清與聞性命之指泄太原豪黠孟氏挾其家人暴里中鼎按以法指揮董敬誣人下獄已論斃鼎廉其枉出之後歷官戶部右侍郎

宋信字中孚趙州人成化五年以舉人任榆次令有清操不事鞭扑而張弛鑿鑿中理境內大治

梁琮字廷玉蠡縣人成化間以舉人任榆次令貌古樸言呐呐不出口而彊毅有爲治具畢舉

劉偉陝西朝邑人成化間以進士任文水令持身清慎遇事剛方有爲嘗違衆議積穀萬餘石備荒歉民卒賴之擢監察御史

張壽陝西華陰人成化間以舉人任太谷令性高潔剛正
有爲時衣舊布袍飯脫粟佐以藜藿部使過邑中供億
甚菲頗怒之旣入其寢室惟律一部公服一襲乃亟加
優禮任九年以內擢去

李時宏治間任岢嵐剛柔適中賞討必信當道才之累行
旌異陞漢中府同知民遮道餞送無不泣下

劉經直隸宛平人宏治間以舉人任太原令性坦直政尚
和平前令劉敏以嚴有聲經以寬繼之時稱濟美擢監
察御史

溫敬武安人宏治五年以監生任榆次主簿操守甚嚴請
托竿牘咸謝絕有材幹能治繁劇

張鐸字道鳴陝西人宏治六年以舉人任榆次令持身精

介視事後閉門絕客政平訟簡吏民皆懷尋改嵐縣遮道泣留者數千人

張鑑河間人宏治九年以舉人任榆次令性溫和能恤民宇文鍾乾州人宏治九年以舉人任榆次教諭學問宏博善開導諸生有疑義批卻導窾不數語輒曉暢其以文來正者就所製爲潤色填刻數十篇人人悅服後舉進士累官監察御史

劉鉉陝西咸寧人宏治間以舉人任祁令有威嚴能執法人望而畏之

楊光澤山東沂水人宏治間以舉人任興令廉而能寬撫字有方廢墜者及時建立尋調洪洞去之日老稚俱垂涕

馬圖林縣人宏治間任興縣民素頑悍公賦屢年不輸前
官多被訟去圖至歎曰豈惟民之過哉蓋由刑罰不中
民視官如仇讐耳當以公平處之居六年百姓化其政
前所負租悉爲補輸改建文廟於城中及陞去興人爲
立祠後任沁州知州致仕子卿登進士官山西提學副
使終都御史

申綸永年進士正德間以平陸調太原縣度量寬洪爲政
持大體期年陞潞州知州官至按察司副使

高道邠州監生正德間任清源政寬民悅刑省令行有直
父母之稱

許孜咸陽舉人正德間尙嵐學正博極羣書誨人不倦其
堂聯云報國陶鎔忠孝士窮經講究聖賢心至今傳誦

蘇民陝西人正德元年以進士任榆次令務持大體不事苛細民有犯者以道義諭之不率始懲以法暇日名諸生與之講解圖籍聞者奮起

安國字良臣綏德衛人通春秋子史後襲世職指揮僉事正德三年中武會舉第一爲右副總兵協守大同徙延綏十一年冬寇二萬騎分掠偏頭關諸處國偕游擊杭雄馳敗之岢嵐州斬首八十餘級獲馬千餘匹寇遂遯晉都督同知卒諡武敏

李文字洛南正德間進士初任咸寧知縣陞主事恤刑陝西釋寃滯辨誣枉奏免逋欠數千人忤當道謫楚雄府推官改太原同知平孟礦之亂民賴以安及署平定篆釋獄禁綏征求節財用均徭役恤逃亡撫窮獨民用以

和

梅寧歸德舉人正德間自平谷教諭陞任太原縣有治事才前令修城數年不完寧至民咸樂趨一月畢工武宗由榆林幸宣府路經太原供應之物凡百俱備民不知擾

陳溥鄆陵人正德四年以進士任陽曲令性剛貞而勤慎措施務洽民心擢監察御史

鄭德崇字道夫山東汶上人正德六年以進士任榆次令性簡重爲政清而能整不樂以威刑督吏民而服其化者皆肅然奉法後調德清縣

張穆完縣人正德七年以舉人任榆次令性剛有威望遇事能斷抑侵漁剔浮蠹尤崇獎士類貧不能存者輒捐

俸給之後以覲卒於道士民遙奠之哭聲震野

陳惻陝州人正德九年以舉人任榆次令性嚴重爲政務
經久遠抑強除蠹興學校理冤抑

韓光表直隸任邱人正德間以舉人任徐溝令正直勤政
事自旦至暮治文書不輟心存愛民務令得霑實惠

王堯卿招遠人嘉靖初以監生任太原教諭待士以誠咸
服其教後八年致仕

徐元孝字子順浙江餘姚人嘉靖二年以舉人任榆次教
諭性夷曠勿遽中言天常自若循循善誘從遊者皆彬

雅成名士典試四川

羅平陸知縣

宋橋濮州人嘉靖九年以舉人任徐溝令雅意愛民興舉
悉當飛蝗蔽天獨不入其境

俞鸞字應和陝西靈州守禦所人嘉靖間以進士任榆次令精明有操守爲政寬猛互濟稱能吏云

王一民東明人舉人嘉靖間任文水令清節自持政平不擾築城垣建各鄉堡若干座後以誣劾掛冠去人共惜之

張天憲直隸高苑人嘉靖間任太原縣丞性廉潔泣事明敏待人以誠邑賦舊多逋欠天憲示以期輸者雲集後以前任安化事罷

鄭鎬河南安陽人嘉靖間以舉人任交城令剛直有爲修葺學校城池公署倉庾之敝壞者又於城之四面及東南路植柳成林會歲饑人賴之以濟後擢安州知州致仕去

王遴字繼津霸州人嘉靖間進士爲兵部員外郎爭楊繼
盛事忤嚴嵩遷僉事再遷尙嵐兵備副使有威名爲巡
撫所忌劾去官民相率訟寃詔許起用仕至兵部尙書
歸卒贈太子太保追諡恭肅

王宮用字近臣直隸武安人嘉靖間以進士任榆次令前
令率尙操切宮用獨馭以寬和訟平賦清事咸就理邑
稅歲千金多中飽宮用盡以報藩司無所染政暇輒進
諸生教以立身行己之要尋以憂去後仕至太僕寺卿
劉化湖廣長沙人嘉靖間以進士任交城令有吏材居官
以廉能著未浹期政教大行尋調安邑累官尙寶卿
蕭大亨字夏卿山東泰安人嘉靖間以進士任榆次令性
端嚴持大體不務赫赫聲而諸所厝注士民咸食其利

後總督宣大視榆人爲故赤子撫恤尤摯嘗以關城卑薄爲堯其四面榆人立石紀之

王珠鹽山人嘉靖間以吏員任陽曲縣丞才識明敏折獄能晰情僞善應對嘗議欵塞外言辭侃侃聽者悚然尋擢大同府通判

周誥汲縣舉人嘉靖間任徐溝沉靜有體馭下端嚴陞平陽府同知

張天錫霸州進士由蘭州知州陞太原同知愷悌宜民陞陝西按察司僉事

江樊開化舉人貌樸心古詩詞敏捷嘉靖年爲太原府通判監修邊城齋金賑饑秋毫無染當道者稱之

薛編魏縣人嘉靖間任文水立政平易綜理詳密完逋賦

均徭役誣訟風息吏畏民懷其清約勤慎始終不渝
王楫新泰人嘉靖間任太谷巖明不苟豪猾斂跡政平訟
簡庭無私謁雅意愛士貧者多方賑濟歸日行李蕭然
父老傳頌之

崔三畏蠡縣進士嘉靖間任太谷有惠政民有犯先諭以
義理而後治之未嘗任情以盡法尤注意於學校後徵
於朝士民遮道泣留歷官四川叅政

張九經文縣舉人嘉靖間任太原通判居官守正不求聲
譽一生嗜古好學不問家產

張世忠字顯甫山海衛人嘉靖五年舉武會試爲大同叅
將拒寇丁家莊有斬獲功二十一年爲山西叅將七月
寇屯祁縣與副總兵段堂等合五營兵襲之堂軍潰於

陸支村世忠力戰死贈左都督諡忠愍立祠致祭時百戶張宣張臣亦死並予卹而堂等胥論死

於惟一懷寧人嘉靖間以進士任太原府知府初下車會歲比不登民多流亡卽爲繪圖上請不待報可徑發倉廩賑之後擢陝西副使去之日送者塞路

張祉固始人嘉靖間以進士任太原府知府愷悌慈仁數遇水旱躬爲祈禱敵騎入犯士民惶恐內徙祉冒雨登陴晝夜巡警累官陝西巡撫

黃卿益都人嘉靖間以進士任太原府知府博學有操行重農桑崇學校慎刑獄黃土寨大水漂沒居民以千計掩骸賑恤不遺餘力民舍火將延及學宮泣拜禱風反火熄在任六年擢浙江叅政後累官江西布政使

金礪字霜鐔河南西華人嘉靖間以進士任太原令仁明能悉民隱舊造夏秋赤歷里書索費不貲計事給食歲省五百餘金水利歲久壅淤相其高下開新渠四十餘道溉田數百頃邵姚等都逃亡者過半給以籽種緩其徭役復業者千餘家又以學校爲育材地躬校閱賑貧乏鼓舞備至而涖任之初卽製戎器火具若干簡閱訓練爲百年計後遇敵竟以有備得免其經理詳密皆類此尋調汾陽父老爭走部乞留已復調陽曲涕泣攀臥車累日不得發陽城賈贈有文紀之

潘縉字朝紳陝西臨洮人嘉靖間以貢生任太原縣丞遇歲凶民朝夕不給而追呼者不爲止抗顏與爭竟得釋有婦抱子詣公庭愬其冤累日無所得食將就斃給以

資斧又嘗念孤貧當隆冬有赤體者蠲橐中金買花布
畀之而災黎無告待以舉火者且數千指也甫七閱月
奉檄督逋賦不欲鞭扑窮民以博上官寵遂解組去太
原人尹祝之

張承惠易州舉人嘉靖間任太谷性嚴毅人不敢干以私
爲政務持大體不事徼察抑侵漁杜奸弊治豪強民賴
以安尤加意於學校每朔望視學召諸生親授講說一
時文行丕變以覲事卒於京士民爲之遙奠哀泣

劉奎耀東鹿人嘉靖間以舉人任太谷令性嚴重爲政雅
尚寬平民畏愛之如父母

王允言直隸容城人嘉靖間以舉人任祁令負清操有明
敏才撫民以惠衙蠹市黠胥屏息嘗遇兵患督吏民捍

禦間并獲安

李朝綱武功舉人嘉靖間岢嵐兵備道慷慨剛直風紀肅然州牧叅戎不相能裁之以法各自悔罪

馮友陝西長安人嘉靖間以舉人任岢嵐州知州岢嵐數遭兵患歲比不登友相視高下肥瘠教以耕作又時歷田間爲言慈孝使知敦行誼成禮俗尋調忻州忻三歲三易守稱難治友馭以威嚴訟師一夕盡徒去中丞上其治行後擢保定同知

張稽古陝西蒲城人嘉靖間以舉人任岢嵐州知州躑直不畏強禦嘗按都御史楊順誣殺沈練事卒擬以法順繫獄死後歷本省按察使晉藩常侍欲以事干之固請遊別墅終弗許次日以盛饌來餽悉委棄溝壑中還其

器其剛介如此

張宗德咸陽人嘉靖間以貢任嵐縣知縣政教修明嘗遇邊警躬督吏民禦之比退復增修城池

劉濬德平人嘉靖間以監生任嵐縣知縣剛毅廉介豪猾斂迹

高鵬山東人嘉靖間任太原營叅將標兵王慶等作亂謀院門前巡撫踰垣避之鵬聞變披衣起坐堂上叛卒適至羅拜階下曰我輩計出無聊願戴將軍爲主鵬以大義反覆開導不聽乃厲聲曰吾王臣寧守義不爲汝曹主也叛卒知不可奪遂殺之時嚴氏在朝以危法中人寵賂滋章當事者惴惴方藉口以自解免終無白鵬死事者然晉人至今稱鵬忠義不去口

溫訓漢陰舉人隆慶三年任太原同知穎悟博學善詩文以清廉著稱陞戶部員外

王學謨朝邑人進士隆慶間岢嵐兵備道方正執法不避恩怨嚴飭武備議築河牆老營諸堡尋陞山東叅政

初旦博興舉人隆慶間任太谷遇事立斷百廢俱舉吏畏其威民懷其德

殷庭舉江西星子縣舉人隆慶間太原府同知承檄均丈定襄地糧悉心區畫不憚勞瘁臚列冊籍永爲遵守性慈祥所至輒進士民誨以孝弟力田之義一時相聚如家人父子定襄人有遐思焉

薛懷奇河南新鄭人隆慶間以貢任交城訓導澹泊自如不繫情勢利與人接歡然終日喜怒不形諸生私相慶

如在光風霽月尋爲權相中傷去

趙禧益都貢生隆慶間文水丞時值寇警日集鄉兵聯什伍登陴固守寇去民有遭殘毒者徧行弔問死者掩埋之

王下賢陝西鳳翔人隆慶間以舉人任岢嵐州知州廉明有禦變才初下車敵大舉入寇下賢陰設守禦具倉卒悉備比大兵過糧餉芻秣能以時供給無缺又約束將卒不得入民舍恣暴虐民感頌之

李慤直隸人隆慶間任岢嵐丞適老成時邊警告急有欲生事要功者議于岢嵐西北扼要路築長城其策甚迂四野驚惑慤力抗不從民用以安

姚德重維縣人萬歷二年以進士任榆次令性甘淡泊事

上官恭謹有禮馭衙蠹市魁以嚴撫恤窮黎則又曲有
恩意

吳三省洛陽人萬歷四年以舉人任徐溝令疾惡如讐廉
幹有爲凡事不屑近功嘗薨縣城爲萬年保障邑人賴
之

李光祖字克肖保安人萬歷間以進士任榆次令仁慈能
濟以嚴毅嘗遇歲饑賑給有法窮乏不至流移人尤感
頌不置後擢監察御史

于天經冠縣人萬歷間以進士任陽曲令清勤愛民初蒞
任卽策款段馬日隨二隸巡行阡陌間勸課農桑倦則
止僧舍炊脫粟飯遇訟者以片詞折之歲饑停徵調屢
蒙詭責不爲動尋以艱去攀卧數千人

徐守謙洛陽人萬歷間以進士任陽曲令通敏有吏才先任榆次有能聲遂以陽曲煩劇調蒞之果斷明肅剖決如流治行大著擢監察御史

李選白河人萬歷間以舉人任陽曲縣丞雅度清操聽訟多所平反時大令屈灼以嚴肅勝選以寬大佐之民愛戴如父母擢知縣去

周永春金鄉萬歷間以進士知陽曲縣念省會習俗奢侈以節儉爲先委曲開導又邑爲藩封地豪宗橫肆多誣陷平民悉裁以法蒞任五年擢禮科給事中

史記事字義伯陝西渭南人萬歷間以進士任介休縣循績最著後蒞榆次益銳意民事築城濬渠嘗修縣志於邑徭役三致意焉擢兵部主事改御史榆民建祠祀之

劉似熬字占宇直隸高陽人萬歷間以進士任榆次令顛
直負氣節捐俸設義學延名士主師席開東陽鎮水渠
溉田數十頃擢刑部郎後以莊浪道佩四符辦理軍務
卒於官朝廷嘉其忠勤予祭葬

周詩德州人萬歷間以進士知太原府性剛直諳練庶務
雪冤抑鋤豪猾寬嚴互劑時稱良守以乞休去

王嗣美朝邑人萬歷進士爲太原推官持已廉約接人平
恕每聽斷多所平反以明允稱擢戶科給事中

李元同州進士由祁縣調陽曲平恕廉明均徭役省解納
飭學宮恤行戶開渠穿井清驛弭盜革一切賠累剝削
之苦民德之立祠以祀

談應春安化舉人萬歷間授興縣教諭率先化導士風丕

變擢知嵐縣吏民畏威逋賦爭輸每朔望進弟子誨以
文藝孜孜忘倦

屈鍾嶽字毓秀蒲城舉人萬歷間任太原清慎敏捷循聲
籍籍擢光祿署正遷北部郎擢大同知府未幾卒鍾嶽
有豁達度不事纖趨居官正直不阿旅櫬歸里行李蕭
然

孫化龍獲鹿人萬歷間以進士知太原府孟有妄男子假
巫爲奸化龍廉得其狀時適亢旱因使問雨期巫窮伏
按左道法誅之在官數年能以廉靜率先屬邑

賈毓祥平度人萬歷間以進士知太谷縣操守巖潔興利
除害有真父母稱

張子清無極貢生萬歷間任太谷縣興學育士減稅甦民

時有何處春臺似太谷之謠擢永寧州知州

李懸同州人萬歷間任祁縣明斷有守興學校均征徭開渠利民凡賄累苛派之弊盡除民被其德立祠祀之

王一龍蘭州人萬歷間以舉人知徐溝縣剛毅不畏強禦無恤士民恩意曲摯後以抗閹宦謫官士民稱屈

于彥英固安人萬歷間以舉人知徐溝縣器識英敏發奸摘伏如神嘗丈量地畝立法均平民咸德之

馬天俸密雲衛人萬歷間任清源縣公明廉幹清釐地畝均平糧石地方永賴

周璧歷城人萬歷間以舉人知交城實心愛民雅甘淡泊裁冗費墾荒田開河渠繕城堡尤加意學校貧不能存者時賑給之

姜一鳴蒲城人萬歷間以舉人任文水縣清介自持治窩
禁暴其清丈田土賑恤凶荒民尤被實德云

郭宗賢邯鄲人萬歷間以舉人知文水縣嚴明識體要嘗
修邑城迄今稱保障

文養浩耀州舉人萬歷間知文水縣嚴革私科勾攝概差
木皂積穀備荒四境肅靜嵐縣歷雲南知府建祠栢茆
山巔祀之

陳良謨吳江舉人萬歷間文水教諭泊書經聯社課藝從
學者雲集中丞魏學憲杜檄請鎮城書院訓多士甲午
秋分較闈中稱得人鄭之僑王在臺鄭宗周皆出其門
擢涪州知州

李從心南樂進士萬歷間岢嵐兵備道禁饋遺懲刁惡待

軍民以恩收羅材勇以備時用人思敵愾吏治民情無一不悉

趙彥虜施人萬歷間以進士任岢嵐兵備道有應劇才尤精兵畧嘗徧歷所部相度衝緩勾稽芻糧因爲添防守易將衛廣城堡選智勇節省浮費逾十餘萬士民立祠祀之

董仕汝陽人萬歷間以舉人知岢嵐州寬仁不喜立威獨於亂法者不少假嘗廉健訟者立斃于獄一邑稱快擢潞安同知

趙夢麟廣平進士由兵部主事謫嵐縣清丈土地編審丁徭杜豪戶之兼併清奸胥之隱詭重建公廨百廢具舉擢兵部員外

張任學安岳人天啟五年進士知太原縣調榆次崇禎四年舉治行卓異入爲御史後請易武階改河南總兵官褫職卒

湯啟祥宜興人崇禎間以進士知太原府有清操不妄取愛民如子於奸猾爲害者窮治不少貸頌聲大起

孫康周字晉侯安邱舉人崇禎末知太原府流賊入率死士巷戰被執說降不從見殺

任孔當濟寧進士崇禎間任陽曲縣興革利弊時久旱步禱百里未至城大雨如注以艱去攀轅卧留者擁蔽不能行

彭而述鄧州人崇禎十四年以進士知陽曲縣捐金修城募民兵三百人號太原忠義營甲冑旗幟具備又買馬

驟四百頭捐乘馬四匹給驛傳新城南狄梁公祠並祿
其後裔使奉祭祀歲饑煮粥哺饑民

范志泰虞城人爲長史崇禎末署陽曲縣事流賊陷城不
食死

岳維楨東明人崇禎間任清源縣值歲饑盜賊蠡起維楨
留心撫字民無流離又偵盜賊所在搗其巢穴殄滅之
災患所在捍禦必力隣邑胥獲安堵

薛國柱吳堡人崇禎間以進士知交城縣純樸精明能聽
訟勤課士以時值流寇亂斃邑城四面鼓舞有方不期
月事集後遷汝寧道

張首標玉田人崇禎間以進士知交城縣剛方疾惡善折
獄喜與儒生遊捐俸課藝親定甲乙調汾陽

大原州志 卷三十三
王凝命崇禎間任交城縣廉幹有爲時寇盜孔棘悉力剿
撫邑人胡曰蕃以犒軍歿于賊殮而殯之爲文以祭厚
卹其家

武清周華州舉人崇禎間任文水縣性剛正胥吏懾服值
內璫過邑清周持以大體不少屈調汾陽

趙希壯崇禎間文水尉慷慨負氣雖微官不肯自苟適流
寇入境督鄉兵往猝遇賊遽前搏戰歿於陣

井東星朝邑舉人崇禎間任嵐縣嵐多逋賦東星勸輸有
法民不擾而賦集致仕歸闕亂死節

國朝

梁加琦安寨人有勇畧順治元年以將材從征闖賊西走
收太原加琦充前鋒宣

上德意聞者胥踴躍歸附後任四川總統

牛應徵林縣進士順治初知陽曲縣才猷精敏肆應不窮
每大兵過安插晉邸民獲安堵時晉初定軍丁驕悍不
奉約束應徵嚴治之無少貸猾吏奸胥畏如神明開國
時第一循良也

孫建宗歷城人順治元年知祁縣立身清介秉志剛方期
月豪暴股栗

任世選聊城貢生順治二年任文水縣禁革火耗好文學
未幾以忤上司去行裝蕭然士民惜之

楊三知字筠伯良鄉人順治三年以進士知榆次縣有膽
畧姜逆之變與紳民誓守不渝宿城上者六月卒保全
又捐俸創建社學置地畝延師訓士累官神木道死難

恤贈如例

曹之賢遼東人順治四年知文水縣年少精敏剖決如流
吏民畏服姜逆之亂竭力捍禦城陷遇害

李昌汴豐縣人順治四年知興縣剛方有守姜逆之亂城
陷被執賊索印昌汴力抗不少屈遂爲賊殺贈僉事祀
忠烈祠

王之鼎宛平人順治四年以進士知祁縣姜瓖之變爲賊
所執中途遇害贈僉事廕一子

鄧煥元長垣進士順治四年令太原補葺城垣悉埤以磚
會姜瓖入寇多方備禦賊不能拔

張國賢宛平人順治五年以舉人任太原同知姜逆之亂
慷慨臨戎以死事贈副使祀忠烈祠

馬維熙順治間以州同署太原府西路通判上官胥廉其
才姜逆之亂偏關兵變不屈被殺贈知州祀忠烈祠

韓昌毅順治間由進士令太谷有善政吏畏民懷作興學
校邑人立祠祀之

徐淳遼東人順治間任岢嵐兵備僉事道姜逆之亂被執
齊降不屈死贈光祿卿廕子入監祀忠烈祠

鄭運昌江南人順治間任交城尉有能聲姜逆之亂與署
縣周邦翰分城以守賊有內應城陷遇害贈山陽主簿
祀忠烈祠

謝應舉順治間任巡捕都司死姜逆之亂贈遊擊祀忠烈
祠

宋貴中順治間任冀寧營千總死姜逆之亂卹其家祀忠

烈祠

王命新順治間任舊營千總死姜逆之亂卹其家祀忠烈祠

邊大綬任邱人順治八年知太原府有綜理才鉅細畢舉當姜逆初平撫循綬又間閭寢有起色

傅鸞祥字鳴和汝陽人善行草工詩賦順治十年任太原同知愛民敬士循聲卓卓後陞去

賈道醇蒲州人順治間以歲貢任太谷教諭姜逆之亂偕署縣楊其籍守城及陷被執繫獄死之贈助教祀忠烈祠

何顯祖順治間任陽曲主簿署忻州有幹濟聲姜逆之亂督糧於鄉中塗遇賊被害贈太原左衛經歷祀忠烈祠

楊其籍順治間任按察司照磨署太谷縣事有政聲姜逆作亂逼降不屈死之贈布政知事祀忠烈祠

王自亮順治間任太谷尉姜逆之亂賊黨田登奎等入城執之繫獄以死贈主簿祀忠烈祠

周邦翰順治間任布政司都事姜逆之亂賊徧西山交城缺令人胥憚往邦翰獨請行招集流亡撫定驚氓適賊有內應邦翰拔佩刀擊亂者爲左右所殺贈都司經歷祀忠烈祠

劉乃桂唐縣貢生順治十一年知文水縣寬和愛民簿書暇與士人講論文藝解任之日以耗庫金見羈士民共輸千金得歸里

夏長泰華亭人進士順治十三年任文水縣丁酉分較省

九原府志 卷三十三
試稱得人超擢入都囊橐蕭然在道幾不自給

王有銓雲和人拔貢順治十四年知交城縣工詩賦書畫
爲政恬靜和平十六年卒於官有祠在東關今圯

王如辰膠州人乙未進士順治十六年任交城縣嚴明英
敏吏不敢欺嘗修文廟恢宏壯麗累官廣西學道

王家柱鍾祥貢生順治十六年知文水縣申銷逋賦修城
垣新學宮日名諸生課文藝程裕昌王錫命嚴調鼎皆
出其門

吳三畏曹縣舉人順治間知陽曲縣崇儒重士凡諸生公
謁者以禮相接季考月課手自批閱開導懇切解任後
以錢糧欠額不得歸士民皆捐貲助焉

胡虞潢武陵人順治間以進士知陽曲縣以文章自命性

清介甘淡泊同鄉來謁者所贈多失望率怒罵去虞漢
曰吾若壞官箴爲若輩厚遺身且不保若輩能援乎任
滿遷行人束裝蕭然上官憐之

劉果諸城人康熙三年以進士任太原府推官捐俸修文
廟立義學以課山谷秀民太原榆次諸縣引汾水溉田
民爭訟果勤勘驗詳教條爭乃息大盜傳青山等盤踞
葫蘆峪出沒無常授計趙令曰當以勦爲撫羣盜後先
授首富人某訟產先饋黃金五百假黃鼠以進峻却之
當時謠曰死黃鼠瞞不過活青天

王帷籌華州人康熙四年以舉人任祁縣創義學肄書課
藝祁水爲豪強所據民不得灌溉毀其壩俾無敢壅以
自利解組歸民爲立祠

宋時化山陰人康熙五年知陽曲縣捐俸修文廟遇旱取水百里外繫舟山跪禱三日大雨如注擢登州府同知官至副使

趙良璧奉天開原人康熙八年知徐溝縣邑當孔道供億煩重良璧送迎饋餉胥謝絕蒞政五年寬嚴並濟遷西安同知臨行猶念徐溝少科第召紳士捐金築文峰於邑東南云

孫閣達江南通州人康熙十三年以進士知太原縣性簡潔食不重味政先慈恕不輕敲朴犯者至死胥感頌不輟立義學刊省身錄功過格感應篇後以病歸行李一如始至

吳起爵海陽人以克澎湖有功授太原總兵艱歸

儲方慶字廣期宜興人康熙十四年以進士知清源縣時
軍興辦供億又山水數漲爲城害歲修白石堰禦之吏
緣爲奸利民滋擾方慶性介潔糗糧芻藁之費胥假貸
以辦不取民間一錢趙成田茂諸逋賦暨貧不能娶者
多捐俸飲助之復以民饋運不給因停修堰役步禱
白龍神廟明年春山水改道而南去城十里喜曰吾可
保清邑數十年無患矣月集諸生較藝後多成名三年
應博學宏詞試去然猶以城東南隅瀦湖水非民利經
畫不克展爲憾云

戴夢熊浦江人例監康熙十五年知陽曲縣爲政持大體
明敏幹練吏胥不敢欺蒞任六載邑中利弊興革無遺
嘗設義學以訓貧家子弟又嘗葺兩庠八蜡文昌狄公

等廟鐫補寶賢堂法帖士民咸愛戴之

李欽奉天鐵嶺人康熙十九年知清源縣性仁厚撫百姓以恩甚得民心遇旱禱雨輒應

甘國基奉天正藍旗人康熙二十七年知太原府性敏果綜練庶務上官倚之如左右手斷獄以片言折之市黠衙蠹皆斂迹嘗捐俸育嬰兒失養者又設義塚葬枯骨在任七年賢聲懋著

唐廉四川人康熙三十六年以舉人知陽曲縣性儉樸衣布衣不曲事上官歲時儀節胥絕尋中吏議罷歸未幾再起知縣事卒不少屈接紳士以禮不受請托翫法者按治不少貸馭吏嚴而有恩前後居官凡七年解組時敝車羸馬行李蕭然人皆謂適符其名云

王奕宣關東人康熙三十七年知榆次縣縣爲西北孔道
凡車馬供應科歛鄉民胥吏因緣以爲奸奕宣悉革除
之邑中桀黠者悉繩以法

俞卿雲涼州舉人康熙三十八年知交城縣廉能不著上
下交孚雜派陋規首先詳革擢陝西同州同知

丁克成廣寧監生康熙四十二年知清源縣青年蒞任愛
民如子至今誦之

李璠長垣人康熙四十三年以進士任清源縣愷悌慈仁
清節自勵以獎善懲惡爲懷最愛士子政稍暇輒談文
藝蒞任二十載解組後行李蕭然

沈一葵福建詔安人康熙五十七年以進士任陽曲縣值
大旱步行泣禱小五臺甘霖大沛

周人龍天津進士雍正二年知清源縣有吏才長于聽斷
摘奸發伏嚴毅執法一時宵小遁跡折獄詳慎期於得
情累官至臬司風度赫奕

錢標武進人雍正十一年以拔貢宰太原有政聲調榆次
邑素稱難治標寬猛兼施盡皆悅服值歲荒悉心賑恤
全活甚衆修學宮植士類諸生貧苦者咸資給之其於
河渠利民諸事尤拳拳焉擢知朔州病卒貧無以斂榆
人爭賻贈以歸

李廷棟長山舉人乾隆十年署清源縣爲人精敏勤于吏
治工書善詩尤善作養人材立書院以課士人皆思之
倪恩華陽人乾隆十年由廕生在清源令秉公持正廉潔
自飭未久卒於任

高登陞府谷進士乾隆十一年知清源縣坦白正直不可干以私而遇事明決折獄如神凡有差役不忍累民自奉儉朴僕婢數人而已閤境肅然

周景柱江南人乾隆十二年由中書任太原同知月餘擢知太原府性清剛斷案如神庭無留獄時安邑愚民拒城佐中丞阿公統兵往勦景柱留兵不遣隻身往諭衆開城服罪獲其首事十餘人戮之保全無筭